

儀

禮

恒

解

四川總督臣

奏爲故紳學行可風懇

恩宣付史館立傳以勵儒修恭摺仰祈

聖鑒事竊據四川在籍紳士翰林院編修伍肇齡胡峻庶吉士顏楷等呈稱已故國子監典簿劉沅四川雙流縣人生秉異姿幼承禮訓蜚聲黌序早登拔萃之科振藻藝林旋列賢書之薦道光六年選授湖北天門縣知縣不願外任改國子監典簿廉退本於性成孝行孚於鄉里裁成後進親炙者數千人著作等身手訂者百餘卷優游沐德純固葆真念懿行之宜彰懼遺書之就失謹呈該故紳所著易書詩三禮春秋恆解暨四書恆解孝經直解古本大學質言史存等書共十一部計一百四十三

卷並開具事實清摺呈請具

奏前來臣覆查該故紳劉沅至性純厚內行篤誠編纂羣經歷
耄年而不倦櫟模多士育英俊以成材允足標示夫儒風宜荷
褒揚之令典合無仰懇

天恩俯准將已故國子監典簿劉沅遺書事實

宣付史館立傳以勵潛修出自

鴻施逾格除將該故紳遺書事實清冊咨送

國史館查核外理合恭摺具陳伏乞

皇太后

皇上聖鑒訓示謹

奏光緒三十一年十月二十四日奉

殊批著照所請該衙門知道欽此

中書科中書

臣

劉根文敬刊

國史館本傳

劉沅字止唐四川雙流人乾隆五十七年由拔貢中式舉人
道光六年選授湖北天門縣知縣安貧樂道不願外任改國
子監典簿尋乞假歸遂隱居教授博覽羣書過目不忘人咸
服其淹洽兄濬嘉慶元年進士由庶吉士改工部主事屢書
趣其北上沅曰顯揚之事兄已遂矣犬馬之養願得身任之
母向氏遭疾困瘁沅求索醫藥不遠千里齋戒請禱朝夕弗
遑母病尋愈其事親敬養兼隆克論於道兄弟之間力行仁
讓兄沒撫猶子如己出姪婦孀居無子急爲立嗣飲食教誨
勞怨不辭宗族鄰里助其婚嫁喪葬者不一而足先是沅幼
羸善病父汝欽精易學洞澈性理謂河出圖洛出書聖人則

天實天啟聖人以明道化不僅在數術也伏羲主乾南坤北
文王主離南坎北卽先天後天所由分且連山首艮歸藏首
坤艮止坤藏之義卽大學止至善中庸致中和之學文王之
緝熙敬止成王之基命宥密胥不外此沅因仰承庭訓更求
存養之功內外交修久而知愚必明柔必強仁者壽大德必
壽聖人窮理盡性神通造化非若道流欺世之談也讀左氏
傳至劉子曰民受天地之中以生所謂命也稱其言至爲精
粹於四子書中極爲發明如以集義爲養氣之原斥修士爲
襲取以反身而誠欲仁仁至必有事焉勿忘勿助長等語爲
治心之本殊釋子之頑空又謂喜怒哀樂之未發謂之中發
而皆中節謂之和積中以求和則可寡尤悔以底於純粹而

無欲且能知行合一以身教人故師取者多此理其解經盡
除門戶之見不苟異同務求當於經義乃至詁氣抑揚之間
必悉脗合論史事如湯武放伐其先本自爲一國不過以小
事大並非以臣伐君夷齊叩馬不見經傳史記但因采軼詩
而記之然謂當取信於六藝則史公固不信此事故引孔子
求仁無怨之言以駁之其他所發明多類此又以老子書每
多誤解明瞿曇氏亦有人倫謂學者但學孔氏而釋道之真
者卽不能出此範圍僞託者不得藉口以爲世害成都南郭
外漢昭烈祠墓傾圯沅鳩率修治因撰明良志略闢蜀漢討
賊之義以正三國志之誤平日裁成後進循循善誘著弟子
籍者前後以千數成進士登賢書者百餘人明經貢士三百

餘人薰沐善長得爲孝子悌弟賢名播鄉閭者指不勝屈咸
豐中侯官林鴻年爲雲南布政使至蜀得沅書讀之驚喜求
問時沅已死因受業於沅弟子內閣中書劉芬盡購其書去
及罷官歸遂以其學轉相傳習閩人稱沅爲川西夫子云所
著書有周易恆解六卷詩經恆解六卷書經恆解六卷周官
恆解四卷儀禮恆解四卷禮記恆解十卷春秋恆解八卷四
書恆解十卷大學古本質言一卷孝經直解一卷史存十六
卷槐軒文集四卷詩集二卷約言一卷拾餘四種二卷又有
蒙訓豫誠堂家訓保身立命要言丁學梯航子問又問俗言
等篇皆言顯理微足資啟發咸豐五年卒年八十有八沅先
無子六十後連舉八男皆能傳其學長子崧雲咸豐二年舉

人沅是科重宴鹿鳴儒者榮之椅文拔貢小京官同治庚午
舉人桂文光緒丁丑進士厯官編修御史梧州府知府棟文
順慶府訓導根文樟文生員孫咸榮拔貢咸煥舉人咸耀咸
輝俱生員

儀禮恆解序

禮者所以經緯人倫也自天子至於庶人修身齊家之事無弗同則凡正心誠意窮理盡性之學本諸心而措之世者無不一聖王以禮化民皆就其時勢風俗而爲之法使咸歸於中和五帝殊時不相沿襲三王異世不相襲禮非謂一代之興必創制顯庸以新天下之耳目也人性皆善萬古無更而習尙所趨恆多悖戾是以監前代而因革實得乎天理人情之安三代以還刑名功利遞相競勝誠身建極之道所爲由一念而推暨於天下國家者多不講求議禮諸臣乃援据遺經強相比附若儀禮一書尤墨守之儒所斤斤而研按也然文武周孔之學乃堯舜以來聖人相傳之道亦生民秉彝人人所有之道本之身徵諸

庶民建諸天地而不悖質諸鬼神而無疑豈必其盡合前人哉
而曰考諸三王而不謬蓋因時制宜適合乎天理人情之極而
已周官體大思精治世規模略備而其法已不可盡行故孔孟
授受門人多以己意爲折衷觀子路爲宰晏朝行事日中而退
吾子以爲知禮則聖人苟遇於時所損益可知矣戴記之書其
言往往不符周制讀者不知其爲孔孟之徒雜記遺言也而反
以爲漢儒所竄疑竇叢生惟儀禮則奉爲楷模委曲傳會然世
代遞降凡宮室衣服飲食及諸事爲皆非昔比矣有如畫餅奚
益民生况夫篇中所載半多不情其爲後儒所輯昭然可見而
或信以爲聖人之言曷怪昌黎以爲難讀耶愚故註釋而辨正
之毋使同人執此以誤將來僭妄之罪良知不免然方今

聖人在上信古而不泥古大一統之規炳然可識矣

道光壬寅小陽月

雙江劉沅謹識

儀禮恆解卷首

凡例

一道莫大於五倫凡禮皆所以經緯人倫也人倫之正必由誠意正心誠正之功非一日而可幾也則於其蒙養卽閑以小學及其成章又教以大學洒掃進退應對舞勺舞象諸儀皆所以約束其身心而徐引之於大道君上持其綱父師踐其實以之成己卽以之成人而禮樂之事服習者久心性之學涵養者純動容周旋可以無不中道矣唐虞三代理化成天下蓋莫不由乎此而其法已不盡傳惟周禮一書尙存其概至於儀文節目之詳則無自而考矣儀禮晚出史記正義七錄云有六十六篇今僅得十七篇旣夕禮有司徹特喪禮祭禮

之下篇實止得十五篇而已鄭康成註之而其書大行歷代諸儒咸有發明朱子九服膺此書人遂奉爲聖經然其繁文縟節均屬周末文勝之習愚於可疑者均已辨於各篇學者但通其大義可取者行之不可取者置之毋斤斤襲陳說以滋惑可也

一道本於天地天地之性人爲貴全其性而施暨於天下萬事無不宜所謂仁熟則義精也古今時勢不同萬國九州民生異俗好尚異宜卽宮室衣服飲食亦不能強齊聖人建中和之極因其俗制其宜五倫必正嗜欲必防則必有禮焉以節文之中夏之於六合彈丸耳周公制作中原僅數千里地吳越滇黔閩廣楚蜀今皆樂土而當時悉以外裔視之聽其君

長之自爲治況後世幅輳益廓民生日用悉不可以古例而執此書以爲治其可得乎

一中庸言經禮三百曲禮三千祇大概約言之經禮周官見其大概其曲禮當時人習而安焉未必區區如印板文字春秋天子無德諸侯變亂孔子獨講明力行之四方來從學禮觀其師弟問答及鄉黨所書固未嘗墨守前人毫無折衷故愚以爲小戴記所載乃孔孟後裔記其緒言後人不達其旨以儀禮爲經戴記爲記遂令聖人因時制宜之意全晦熊氏朋來曰儀禮士冠禮昏禮鄉飲酒射禮燕禮覲禮士虞禮特牲饋食喪禮皆有記愚謂此書之記記其正文所未備戴記所言則發明其義熊氏所言非指戴記也第解者多誤反是此

而非彼愚今悉正之讀者必合兩書細觀之乃知其得失

一前人謂不讀儀禮則無以見古人制作之遺是也而得其大義必當變化其節目此非儒生之事也而前人或仿照古法勒爲成書則僭且迂觀程子主司馬之喪用冒而蘇東坡譏之亦可見古禮斷不可行於今記曰言而履之禮也行而樂之樂也履之樂之者何事非仁義乎仁者天之性純乎理而仁全當乎宜而義精動容周旋不必斤斤古制自足安人安百姓矣

一李如圭作釋宮朱子因之俾人明於古人宮室之制然後儀禮所言諸禮可以知其所在誠篤論也然四海之內風俗不齊卽南北相較宮室有斷不可通用者四海之外不待言矣

周末文勝爲禮者第講求於度數節目之間故孔子曰禮云禮云玉帛云乎哉又曰人而不仁如禮何子大叔亦曰是儀也非禮也禮者天理之節文無天理而但務節文後進於禮樂之君子也強天下之宮室如古人必有所難通使人行此書之儀文尤理勢所必阻愚是以略之焉

一我

朝

聖聖相承制作明備不違古而不泥古

欽定儀禮義疏刊謬擷粹廣大精深一空從前議禮家言而範圍天下則薄海内外各因其宜窮荒極壤悉戴聲靈未嘗拘拘於此書實無不共遊於化字蓋

大聖人建極敷極爲曠古所未有使前人值此必箝口結舌而歎所見之不廣也

一漢儒彙集遺經校定成書其功不可沒特得聖人之大道者鮮故循其節末失其本原名物象數之制詳而隨時處中之道畧自漢以來註儀禮者我

朝四庫全書所收二十二部附錄二部凡有所採者悉存之學者亦可以得其厓略矣但考禮者將以見諸施行非徒紙上空言五帝殊時不相沿樂三王異世不相襲禮因時勢準人情因革損益不違乎中正然後可以成己成人推諸天下今觀諸儒之說斤斤於儀文節目之間不計可以施行與否徒來聚訟之誚無補治世之經故不暇一正也識者鑒之

雙江劉沅識

儀禮恆解卷一

士冠禮

冠加冠也古者不薙髮年二十而始冠責以成人之事
前此爲童年言士上通於天子諸侯下該凡民也

筮于廟門

筮市例反
廟古廟字

古惟通士以上有庸凡庶人卽以輿爲庸以其
爲祭五祀處也此庸卽此士以上則于庸也

主人立冠朝服緇帶素鞵卽位于門東西面

冠如字朝直遙反
後朝服同鞵音畢

主人將冠者之父立冠一名委貌以黑緇爲之立天之色冠
加於首至尊故立也朝服布衣而素裳貴樸也緇深黑色凡
染黑五入爲緇七入爲緇鞵蔽膝也以韋爲之素白也朝服敬其事也

有司如主人服卽位于西方東面北上

有司卽筮者無論公私惟其
長於禮者亦朝服重其事也

筮與席所卦者具饌于西塾布席於門中闕西闕外西面饌土

塾音執闕魚列反闕音域古文闕爲樂闕爲塾

筮謂著也云筮者以其所用名之席蒲筵也所卦者所以畫地記爻卦之具用木爲之具俱也饌陳也皆陳之於門外西堂又布席於門中將坐而筮闕門下橫木爲內外之限者其門兩旁之木謂之棖棖闕之間謂之中門闕即門限也

筮人執筮抽上韠兼執之進受命于主人筮初革反

筮著之器韠所以藏筮抽上韠以露其筮並執韠與筮進而受命於主人問所以筮之意筮本在韠未取出云兼執者合韠與筮而言

宰自右少退贊命筮人許諾右還即席坐西面卦者在左還音下

同

宰有司主家政者自主人之右少退以贊主人之命云贊命者主人自陳其欲筮之意虞有不達則宰贊之也筮人既得主人之命許諾還就席而坐右還者進受命則由左還則由右也坐西面而啟韠以筮書卦者在左

卒筮書卦執以示主人主人受眊反之筮人還東面旅占卒進

告吉若不吉則筮遠日如初儀

眊音視旅古文作𠄎

卒已也書卦於版以示主人主人受眊仍反諸筮人筮人還轉東面與其屬共占之卒事進而告吉如或不吉又另筮遠日一切禮儀如初

徹筮席宗人告事畢

徹去也敘也宗人有司主禮者或曰如再不吉則又筮乎曰否卜筮不遇三另日更筮可也

主人戒賓賓禮辭許主人再拜賓答拜主人退賓拜送前期三日筮賓如求日之儀乃宿賓賓如主人服出門左西面再拜主人東面答拜乃宿賓賓許主人再拜賓答拜主人退賓拜送宿贊冠者一人亦如之

戒告也云戒者重冠事必擇其賢者而共成之不罷避賓客也惟以其賢也而告之是是之故賓謙讓而辭然以其嘉禮

不可終御也故卒許之禮謂謙讓也主人拜賓之許賓又答拜主人去而賓拜送之至將冠前三日主人又於已戒眾賓中筮其尤賢者使冠子其禮如求日之儀既得其人矣乃於冠前一日往宿賓宿之爲言速也賓聞主人來知其所服取相稱也不必定朝服出門而拜迎左者出以東爲左入以東爲右也主人拜其出迎入乃致親求主冠禮之意又宿一贊冠禮者一人亦如之

厥明夕爲期于廟門之外主人立于門東兄弟在其南少退西面北上有司皆如宿服立于西方東面北上擯者請期宰告曰質明行事告兄弟及有司告事畢擯者告期于賓之家擯臂印反厥明夕冠期前夕也爲期期約兄弟子姓也於廟門者冠在廟也有司主人羣下執事之人兄弟子姓至近先約齊之以免臨事有誤至所戒諸賓亦就近族黨也故卽日告之以期此期謂冠之時也前此戒賓已共知其日今又告之以何時始行禮古時比閭族黨易以周知故其禮如此

夙興設洗直于東榮南北以堂深水在洗東

直音值深式蔭反

夙早也興起也洗承盥洗者棄水之器賈氏曰士用鐵大夫用銅諸侯用白銀天子用金罍祭屋翼也賈氏曰卽今之櫛風云祭者與屋爲榮飾言翼者與屋爲翅翼堂深者從堂廉北至房室之壁南北以堂深者洗去堂遠近取於堂上深淺假令堂深二寸洗亦去堂二丈以此爲度凡度淺深曰深後並放此敖氏繼公曰水所以盥洗者也洗在東方則沃洗者宜西面故水在洗東

陳服于房中西墉下東領北上

墉牆也所陳之服見下文東領領向東北上便其先取在南者

爵弁服繻裳純衣緇帶韎韐

繻許云反或作熏韎音妹韐音衙

鄭康成曰此與君祭之服色赤而微黑如爵頭然冕之次賈氏曰凡冕以木爲體長尺六寸廣八寸以三十升麻布衣之上玄下纁前後有旒爵弁之制大同惟無旒而爵色爲異又冕者俯也低前一十二分故名冕爵弁則前後平其尊次於冕纁淺絳色凡染絳一入謂之纁再入謂之赭三入謂之纁四入則朱言纁裳於衣上者以其與冕服之裳同尊之也純衣絳衣也餘衣皆用布純衣與緇帶同色韎韐緇絛也其制似韠以韋爲之天子繪山或火或龍章諸侯火而下大夫山

士無飾

皮弁服素積緇帶素鞶

鄭康成曰此與君視朝之服同皮弁者以白鹿皮爲冠象上古也賈氏曰上古以白鹿皮冒覆頭鉤領義項至黃帝始爲冕積猶辟也以素緇爲裳辟疊其要中

玄端玄裳黃裳雜裳可也緇帶爵鞶

玄端朝服之衣其裳以玄爲正若無玄裳許其用黃裳及雜裳以上三服同用緇帶者士惟有一緇神之帶加冠視以將來成人之貴服而帶則從其分也爵鞶猶爵於帶以寓飛翔之意

緇布冠缺項青組纓屬于缺緇纁廣終幅長六尺皮弁笄爵弁

笄緇組紕纁邊同篋冠如字下同缺如字屬青燭纁所紩反又所買反廣古曠反長直亮反笄音雞紕音

宏篋苦協反

缺項者冠後當項處微留一缺以青組纓屬於缺以便固冠也纁方目紕也以緇色之纁紕髮而結之乃加以冠非既冠

而後用纒韜髮也。纒廣一幅長六尺取其足以韜髮并簪也。皮弁爵弁各視其冠之廣狹以爲并也。纒組紱緇色之組結以爲紱。紱冠卷也。繫冠兩旁以爲飾者纒邊紱。緇組而其邊則纒色也。以上皆同儀而陳之。

櫛實于簪。櫛莊乙反

櫛以理髮方
曰笄圖曰簪

蒲筵二在南側尊一甒醴在服北有篚實勺解角柶脯醢南上

無音武篚方尾反勺上灼反解支
義反柶音四醴音海古文無作麻

筵席也賈氏曰敷陳曰筵藉地曰席散言之則筵席通故諸敷席在地者多言筵二者一爲冠子卽下文筵于東序少北也一爲醴子卽下云筵于戶西南面也。御案在南在三服之南通指篋與篚不專言蒲筵篚在篋南筵在篋南卽康成曰側特也無偶曰側服北纒裳北也篋竹器如笥者勺尊升所以酌酒也爵三升曰解相俎如七以角爲之取其滑也

爵弁皮弁纒布冠各一匱執以待于西楹南南面東上賓升則

東面。匱素管反站丁念反
古文匱爲筵站爲櫛

御案冠弁是主重於他器服故執之而不陳其序在陳器服後者爲執以待事也賈氏公彥曰上文舉冠以表服冠實不陳此專爲冠言之鄭康成曰爵弁制如冕黑色但無纁耳士之皮弁無玉無象即飾匱竹器名今之冠箱也執之者有司坊在堂角敖氏繼公曰弁冠特別於西方而統於賓蓋以賓專掌冠事使若賓之物然南面而東上及東面則北上矣

主人立端爵韞立于阼階下直東序西面

阼才故反

鄭康成曰立端士入廟之服阼猶酢也東階所以答酢賓客也堂東西牆謂之序直當也

兄弟畢袵立立于洗東西面北上

袵止引反又至印反又音眞古文袵爲均

敖氏繼公曰袵如袵端袵之袵被服之別稱立端畢袵立謂盡服立端也洗東於主人爲東南

擯者立端負東塾

擯者相主人禮故在東堂以俟云負塾者主人直東序擯者近牆而立讓其地與主人行禮也

將冠者采衣紒在房中南面

紒音髻又音界古文作紒

采衣童子之服鄭康成曰縹布衣錦緣錦紳并組錦束髮皆朱錦也紒結髮敖氏繼公曰童子連裳於衣蓋深衣之制紒

露髮爲紛凶時謂之髻吉時謂之紛內則言未冠者亦用纓此乃紛者爲將冠去之朱子曰房戶宜東南壁東西之中而將冠者在房中當戶而立也

賓如主人服贊者立端從之立于外門之外

贊者贊賓者擯贊者之服皆降主人一等衣冠同而裳異故此別言立端外門大門

擯者告主人迎出門左西面再拜賓答拜主人揖贊者與賓揖先入

蓋贊賓者先入告擯者而擯者告主人出迎之相拜畢又揖賓延之入己先入亦揖贊者尊賓也

每曲揖至于席門揖入三揖至于階三讓主人升立于序端西面賓西序東面

每曲揖卽下文三揖也曲過曲之處主人揖兩先入門右西面賓入門左贊者皆入門左東面賓主相對一揖又揖賓使登登階又揖至階賓不敢遽升則讓主人辭必讓賓先登賓又辭如是者三卒讓賓先升主人乃升無主人先升之禮也

序端東序頭敖氏曰主人立于序端北當序也賓在西序負序也主人不立於東序者辟子之坐且不參冠禮也賓不背文升省

贊者盥于洗西升立于房中西面南上主人之贊者筵于東序

少北西面

盥古婉反音管古文盥皆作浣

敖氏曰盥者重冠事故將執事而自潔清也盥于洗西者洗西無簋故得辟正賓而盥于此房中南上賓位先筵於東序爲將冠者布席也

將冠者出房南面贊者奠纁笄櫛于筵南端

古文櫛爲筵

鄭康成曰南面立于房外之西待賓命贊者賓之贊冠者敖氏曰奠猶置也置於筵南端以冠者升降由下也

賓揖將冠者將冠者卽筵坐贊者坐櫛設纁

賓揖將冠者卽筵贊者爲設櫛與纁云坐設者坐而設櫛與纁也朱子曰古人坐法以膝著地兩趾向後如今之跪

賓降主人降賓辭主人對賓盥卒壹揖壹讓升主人升復初位

賓降將就盟主人不敢安位亦降賓辭其敬已而主人以己煩辱賓意對但其辭未傳耳賓盥卒壹揖壹讓而升主人復初位賓不然者爲將行冠事也

賓筵前坐正纓興降西階一等執冠者升一等東面投賓

冠如字

纓本無不正賓坐正之以示敬也降階一等以受冠亦示敬也執冠者東面授之冠纓布冠也

賓右手執項左手執前進容乃視坐如初乃冠興復位贊者卒

項胡港反視至宥反下同

冠後爲項前冠之前進容進而爲客鄭康成曰行翔而前鶴也至筵立而視之視辭見後視畢乃坐而冠之賓復西序東面之位贊者設缺項結纓以終其事卒終也

冠者興賓揖之適房服玄端爵韞出房南面

賓揖之進房服玄端爵韞而出示眾賓以容體以上始加也

賓揖之卽筵坐櫛設筴賓盥正纓如初降二等受皮弁右執項

左執前進祝加之如初復位贊者卒紼

賈氏公彥曰冠者坐訖當脫去緇布冠乃更櫛也笄有二一
首紒內安髮之笄一是冕弁固冠之笄此未冠而設笄明是
安髮笄也緇布冠亦宜有之彼不言者恐與上兩弁之笄相
亂又此言設笄彼言設纓可互見矣其皮弁固冠之笄則賓
加弁時自設之可知卒紼終其繫紼之事其繫紼也先繫一
端於笄之左端繞頤下而上復繫一端於笄之右端所以固
笄

興賓揖之適房服素積素韞容出房南面

賈氏公彥曰興冠者加皮弁訖起而賓揖之也不言緇帶可
知也加緇布冠時亦有容至此益盛乃言之御案始加云
進容乃祝言賓之自正其容示冠者以觀法也再加
云容見冠者知棄其幼志自敬威儀矣以上再加

賓降三等受爵弁加之服纁裳韎韐其他如加皮弁之儀

鄭康成曰降三等下至地他謂卒紼容出敷氏繼公曰受
爵弁降三等者以其最尊故就而受之不言純衣省文也

徹皮弁冠櫛筵入于房

冠如字

賈氏公彥曰冠卽縞布冠微賓贊者及主人之贊者爲之以
上三加三加既畢徹皮弁冠櫛等及筵惟爵弁著之以受醴
至見母兄弟姑
姊訖乃易服也

筵于戶西南面贊者洗于房中側酌醴加栴覆之面葉

古文葉爲櫛

戶西戶牖間客位贊者設筵於此以醴冠者尊之如客且辟
主人也洗盥而洗爵側與特通贊者一人酌醴無人佐之也
相醴七也若今匙然葉卽匙頭用時仰之贊者
設之而非自用故覆之以授也葉向外故云面

賓揖冠者就筵筵西南面賓受醴于戶東加栴面枋筵前北面

枋彼命反今文枋爲柄

賓揖冠者使就筵冠者立於筵西南面贊者以醴授賓賓受
之於戶東加以栴面柄冠者立於筵前北面使冠者卽席而
受

冠者筵西拜受觶賓東面答拜薦脯醢

冠者筵西南面拜受觶賓東面答拜之醴用解貴其質也薦進也贊者於時並進脯醢

冠者卽筵坐左執觶右祭脯醢以柶祭醢三興筵末坐啐醢捷

柶興降筵坐奠觶拜執觶興賓答拜冠者奠觶于薦東時七內反捷初

治反又作錡又作扱又作建古文啐爲呼

祭祭先代爲此食者示不忘本也以柶祭者以柶扱醢一再而三啐嘗也捷柶嘗醢後以柶挿於觶中醢間坐於筵末謙也降筵坐而奠觶拜謝賓之醢己也執觶興賓答拜冠者自奠觶於薦東薦東席前空處奠置也敖氏繼公曰不卒爵而奠觶者此禮不主於飲也於薦東者堂上自奠其觶之節筵豆云薦者上禮云薦脯醢故因其事而名之後皆放此以上醢冠者

降筵北面坐取脯降自西階適東壁北面見于母見賢徧反下同

取脯以見母者明其冠而受醢所以特見母之故也東壁房外之北堂冠禮房中陳服贊者有事焉母不可以位於房齋出居東壁子就適此見之

母拜受子拜送母又拜

受受醴也父母之尊一也但禮母統於父冠禮由父命而必藉賓以成之今冠禮既成母幸其子之成人而又重賓之爲己冠子也母無面拜賓之禮則受醴如受賓餽故拜受之子拜送醴亦以爲此脯醢固賓之所授也母故又拜朱子曰古人坐卽是跪低手祇肅便是肅拜則此母之拜俯手而已以上見于母

賓降直西序東面主人降復初位

賓降直西序南當於階初位阼階中直東序之位

冠者立于西階東南面賓字之冠者對

西階東西階下之東也賓字之當有勸勉之言故冠者謙詞以對其詞不著蓋勉以成人之義任人爲之無成說也以上冠加字

賓出主人送于廟門外請醴賓賓禮辭許賓就次

賓冠事畢而出廟門外主人送出請醴賓以謝其勤勞禮辭禮讓而辭也次在門外更衣處以帷幕簟席爲之

冠者見于兄弟兄弟再拜冠者答拜見贊者西面拜亦如之入

見姑姊如見母

姊將此反

兄弟贊者皆先拜以重其既冠而冠者均答拜之言贊者則
眾賓可知入入寢門也廟在寢門外言見姑姊則姊亦在其
中

乃易服服玄冠玄端爵韠奠贊見于君遂以贊見于鄉大夫鄉

先生

冠如字贊亦作摯音至

易服不服朝服以其未仕也賈氏公彥曰初冠時服玄端爲
緇布冠服以緇布冠冠而飲之故易玄冠醴玄端也見于君
蓋鄉大夫之子弟若庶人則但見於鄉大夫鄉先生而已鄉
先生齒德俱尊者此終言既冠見君大夫等之事耳其實見
諸人禮當在醴賓之後非
一日一時所能畢其禮也

乃醴賓以壹獻之禮

鄭康成曰壹獻者主人獻賓而已無亞獻者賈氏公彥曰主
人獻賓賓酢主人主人將酬賓先自飲訖乃酬賓賓奠而不
舉賓主人各
兩爵而禮成

主人酬賓束帛儷皮贊者皆與贊冠者爲介賓出主人送于外

門外再拜歸賓俎

儷音麗力移反古文儷爲離

飲而從之以財貨曰酬束帛十端儷比兩皮謝賓之勤勞也贊者凡贊者皆與皆與於飲酬也第所酬有厚薄耳贊冠者爲介言眾贊者中贊冠者之人爲賓之介與凡主人之贊者不同欲酬當視眾贊者加厚也歸賓俎歸諸賓家朱子曰此上正禮已具下文皆禮之變

若不醴則醢用酒

醢子召反

敖氏繼公曰醢與醴大意畧同惟用酒而儀文繁爲異冠禮之始惟醴而已然少近於質故後世聖人又爲此醢禮與之並行言若者文質在人用之

尊于房戶之間兩甒有禁玄酒在西加勺南枋洗有筐在西南

順

房戶間者房西室戶東也兩甒一酒尊一元酒尊元酒新水也不用甒猶設之者不忘古也禁承尊之器名爲禁者禁酒

酒也加勺加於二尊之上而覆之也元酒本不用勺加勺者不以無用待之坊間者爲酌者北面執之便也洗承水器賈氏公彥曰用醴之時醴尊在房故洗亦在房今醴用酒與常飲酒同故洗亦在庭醴陳於洗西南順北爲上也按設洗當在設尊之前上文言醴用酒卽順文勢而言尊此言洗有篚不言設正以設洗在尊之前也

始加醴用脯醢賓降取爵于篚辭降如初卒洗升酌冠者拜受賓答拜如初

賈氏公彥曰前三加訖乃一體於客位用脯醢此始加訖卽醢於客位用脯醢前用醴時醴在房贊者酌授賓賓不親酌此則賓親洗爵酌酒故有升降也如初如初醴時之儀

冠者升筵坐左執爵右祭脯醢祭酒興筵末坐啐酒降筵拜賓答拜冠者奠爵于薦東立于筵西

賈氏公彥曰此雖用酒其行事與醴同惟彼出房立待賓命此醢訖立於席西待命爲異朱子曰此正醢禮也下兩醢及後章三醢凡言如初者皆謂如此禮

徹薦爵筵尊不徹

後加薦爵當更設故徹初加之薦與爵所以新後醺之禮也惟筵尊則三加仍之

加皮弁如初儀再醺攝酒其他皆如初攝書摺反今文攝爲攝

攝整也更整頓之朱子曰如初如前一章之儀下條放此其他皆如初言惟攝酒異於始醺其他皆如之也

加爵弁如初儀三醺有乾肉折俎嗜之其他如初折之設反

鄭康成曰乾肉牲體之脯也折其體以爲俎賈氏公彥曰前二醺有脯醢此更加乾肉折俎嗜至齒嘗之而已

北面取脯見于母

賈氏公彥曰下文若殺卒醺取遷脯以降此亦取遷脯見母亦適東壁母俛拜同敖氏繼公曰若此者見其典禮同也下

放此以上醺禮

若殺則特豚載合升離肺實于鼎設局殺如字局居營反局爲鉗

古文鼎爲密

賈氏公彥曰上醢子用乾肉不殺牲此下言殺牲故云若也
特豚一豚也煮於鑊而熟之升之於鼎以俎盛之則曰載載
合升者載與升皆合左右脾也離割也
割肺而實於鼎以祭局鼎扛鼎鼎覆也

始醢如初再醢兩豆葵菹羸醢兩邊栗脯三醢攝酒如再醢加
俎噲之皆如初噲肺羸力禾反今文羸爲蟬

始醢與前章始醢同無所加再醢加一豆一邊爲有殺牲故
盛其醢也豆盛葵菹與羸醢邊盛栗與脯攝酒三醢於邊豆
之外又加豚俎朱子曰初謂
上章之三醢也噲至齒嘗之

卒醢取邊脯以降如初

取脯以見母與前同邊脯在邊者也御案
不取所祭者不敢褻神之餘也以上殺牲

若孤子則父兄戒宿

父伯父叔父兄親兄或宗兄此第言戒宿而戒賓筮賓一切
禮儀皆父兄主之可知矣下文特舉其異於父子者一二端
冠之日主人紛而迎賓拜揖讓立于序端皆如冠主禮於昨音

髻又音界古文紛
爲結今文禮爲醴

惟冠之日將冠者綏而迎賓不采衣不在房中南面異於父
在也非謂迎賓廂門之外其拜與揖讓蓋賓揖之而將冠者
以父不在不敢受全禮故也立於序端以待賓爲之加冠冠
主冠者之親父也皆如冠主言惟綏迎賓一節爲異其他三
加等禮賓皆如冠主之在行之以有父兄爲主人也禮
卽醴也禮於阼階以父不在旣冠卽爲主可以當阼也

凡拜北面于阼階上賓亦北面于西階上答拜

凡拜謂旣冠之後卽爲主人故北面于阼
階上與父在異非謂未冠以前之拜也

若殺則舉鼎陳于門外直東塾北面

又言若醢而殺牲惟舉鼎陳于門外與父在異直東塾北面
當其南也按敖氏繼公謂將冠子自爲主人父兄但戒宿然
無成人冠服而代父行禮一切加冠受醴等儀皆爲不順
且無乃此冠禮爲虛文乎故不從之以上孤子冠之變禮

若庶子則冠于房外南面遂醴焉

若庶子之冠則三加三醴皆與適子同惟冠在房外爲異鄭
康成曰房外謂尊東也不與阼階非代也不醴於客位成而

不尊

冠者母不在則使人受脯于西階下

母不在被出及已嫁之母冠畢當取脯見母不幸而母有故不在則冠者使人受脯於西階下若母之在者然以示不忘母之意也若已沒則不云不在若疾病子亦可見之若歸寧則未有乘母不在而行冠事者也

戒賓曰某有子某將加布於其首願吾子之教之也

古文某為謀

賓

對曰某不敏恐不能共事以病吾子敢辭主人曰某猶願吾子之終教之也賓對曰吾子重有命某敢不從

病為秉共音恭重直用反下同

賈氏公彥曰此下總見戒宿祝醺醺字之辭上某主人名下某子之名布指緇布冠三加而獨舉布言取其質者謙言之言教之謂教之以禮病辱也此戒賓之辭

宿曰某將加布於某之首吾子將泣之敢宿賓對曰某敢不夙

興

泣音辰今文無對字

泣降也敖氏繼公曰正賓而下宿之之辭皆同
惟以主人之親宿與否別之耳此宿賓之辭

始加祝曰令月吉日始加元服棄爾幼志願爾成德壽考維祺

介爾景福

令吉皆善也元服卽冠也元首也以其在首故名幼
志童心也成德成人之德願謂漸次以企於成德

再加曰吉月令辰乃申爾服敬爾威儀淑慎爾德眉壽萬年永

受胡福

古文眉
作廉

令辰亦吉日也以干支言則曰辰申重也威儀爲德之隅
外敬而內慎斯淑矣眉壽壽者多豪眉秀出胡福猶遐福

三加曰以歲之正以月之令咸加爾服兄弟具在以成厥德黃

耆無疆受天之慶

耆音
苟

歲之正謂當冠之年咸徧也猶言全加也言兄弟以該眾賓
謂觀瞻所繫也先言順德次言慎德成德德必念念順理而
後能慎慎然後成非舊說順慎
通用之謂也以上三加祝辭

醴辭曰甘醴惟厚嘉薦令芳拜受祭之以定爾祥承天之休壽考不忘

醴酒味厚而甘嘉美也嘉薦謂脯醢令善芳香休美也禮以甘酒嘉穀祝其終身之祿意拜受而祭示以敬重此禮期於永慎厥德乃可長受天之休祥以至於壽考也

醴辭曰旨酒既清嘉薦宜時始加元服兄弟具來孝友時格永乃保之直丁旦反古文直爲聲今文格爲假

旨美也直誠也時是也言酒旨而嘉薦得其時始加冠兄弟俱來爾自今以後爲成人當思克孝克友乃可永保其身

再醴曰旨酒既清嘉薦伊脯乃申爾服禮儀有序祭此嘉爵承

天之祜

清思呂反祜音戶

清清也伊語辭祜福也敖氏曰獨言脯取其協韻耳序謂始加再加之次第

三醴曰旨酒令芳邊豆有楚咸加爾服肴升折俎承天之慶受

福無疆

鄭康成曰楚陳列之貌有升折俎亦謂豚以上熟辭

字辭曰禮儀既備令月吉日昭告爾字爰字孔嘉髦士攸宜宜

之于假永受保之曰伯某甫仲叔季唯其所當或假音假甫

鄭康成曰昭明也爰於也孔甚也髦俊也攸所也于猶爲也甫丈夫之美稱朱子曰假與假同福也愚按言備禮儀而卜令辰乃告爾字其字甚嘉爾當勉爲髦士乃稱其字而臻於福永受保之祝辭自伯某至下仲叔季七字乃記者之辭言伯仲叔季皆同此詞經文言某仲叔季易一字用之惟其所當耳古人生而父母即名之冠乃爲之字以既成人則當有字也其字多爲美號故祝辭云然以上字之辭

履夏用葛玄端黑履青絢纁純純博寸絢其于反纁音意

禮之通例衣與冠同色履與裳同色此下言三加之履所以異也舉夏與冬極寒極熱之時用葛用皮其他則不然玄卽黑也絢以絲纁綴於履頭屈以爲飾屈其中纁縫中緗也純緣也三者皆青色青與黑類博寸廣一寸也御案此初加

時所用

素積白屨以魁拊之緇絢纁純純博寸魁苦回反拊方烏反

魁給粉拊注也以給灰塗于上使色白白屨而以緇飾之御案此皮弁服之屨再加時所用

爵弁纁屨黑絢纁純純博寸

纁淺絳色爵弁尊故色纁而以黑爲飾御案此三加所用之屨

冬皮屨可也

敖氏繼公曰不言其色與飾同於上可知

不履總屨總音歲

凡布細而疏者爲總服之輕涼惟喪屨用總冠嘉禮之重者恐人以其輕涼用之故云然以上言冠禮之屨

記冠義

周之典禮明備凡經禮曲禮蓋皆有方策記之周衰漸以凌遲孔門弟子採綴其要及所聞於孔子者記之大小戴之類

是也二戴亦從秦火之後就其聞見所得者彙記之此下所記與冠義與戴記所載詳畧不同又漢儒撮其要者附於篇後以明冠禮之概不必執同異以相疑也

始冠緇布之冠也大古冠布齊則緇之其緇也孔子曰吾未之聞也冠而敝之可也

之冠冠布並如字大音泰齊側皆反緇如帷反

此記用緇布冠之義上古用白布冠齊則緇之無飾故始冠用此以存古緇以纓之餘爲飾也既存古而又緇則失古意故孔子以爲未聞冠卽敝之以非時王所尚也

適子冠於阼以著代也醮於客位加有成也三加彌尊論其志也冠而字之敬其名也

適低益反

此記重適子之義著明也著代明其將代父加尙也加有成尊其有成人之道故以客禮待之一加緇布冠欲其尙質重古次加皮弁欲其行三王之德後加爵弁欲其行敬事神明是喻其志益大也君父之前稱名他人稱字是敬其名

委貌周道也章甫殷道也母追夏后氏之道也周弁殷冔夏收

三王其皮弁素積

母追音牟堆甫或爲父
今文爲斧辟虛羽反

此記三代冠之同異鄭康成曰委安也所以安正容貌章明也所以表明丈夫母發語聲追猶堆也夏后氏以其形名之賈氏曰三冠皆三代朝服之冠道猶制也鄭康成曰弁名出於槃槃大也言所以自光大辟名出於無無覆也言所以自覆飾收言所以收斂髮其皮弁素積以其質素故三代同之

無大夫冠禮而有其昏禮古者五十而後爵何大夫冠禮之有公侯之有冠禮也夏之末造也

古者天子諸侯大夫冠皆用士禮以二十而冠五十後爵故無大夫冠禮天子之元子亦士也諸侯可知公侯之有冠禮夏之末爲末冠而父沒者造之

天子之元子猶士也天下無生而貴者也繼世以立諸侯象賢也以官爵人德之殺也死而諡今也古者生無爵死無諡殺所

諡神
至反

上文言公侯之有冠禮自夏末始則自夏以後固有公侯冠禮而天子不待言矣此下推明古者無大夫以上冠禮之意言天子之元子當其父在齒於士而入大學教以爲人子弟之禮所以抑其驕氣而長其敬德使知貴必由德德必漸次而成無生而貴者也若諸侯繼世而立爲其象賢也若二十未必卽賢故用士禮冠之大夫則官矣然國家以官爵人必以德爲等殺若二十則德未必崇故亦以士禮冠之然則自天子至大夫惟用士禮固有深意於諡亦然死而有諡亦今世之法古則生無爵死無諡諡爵必以德無爵則無德矣何以諡爲

附解聖人治世之法歷唐虞三代而大備然大經大法萬世不易而因革損益隨時制宜有不可盡拘先王之禮者矣若冠禮三代以下已病其難行蓋周家中原止今北五省地其民村堡族居比閭族黨之法平日聯其志氣而養其成德者至詳故戒賓宿賓著代等事行之至爲便順後世幅隕旣廣民多散居卽宮室宗廟亦不能如古制又無論黨庠術序由士

而大夫而公卿之法矣則冠禮必不可行特父兄師長幼訓以循謹長率以中正其義已得而必斤斤於此篇欲彷彿爲之毋乃生今而反古迂滯而不通乎第存其義以示學者使知古人重成人若此固不可謂爲非要朱子作釋宮一篇不敢存之正以其不可行於今耳至篇末論大夫以上無冠禮前人紛紛異議均未達本文之意今亦正之

儀禮恆解卷二

士昏禮

雙江劉沅輯註

昏禮下達

人倫之道始於夫婦易曰有夫婦然後有父子有父子然後有君臣上下又曰男正位乎外女正位乎內男女正天地之大義也夫夫婦婦而家道正正家而天下定矣故昏禮自天子下達皆用六禮雖其閒儀文或因貴賤有殊而總不外六也云昏者夫婦之道成於昏也

納采用鴈

納采媒氏已先通二姓之好女家已許諾乃使人納鴈以信其事摯有六昏禮無貴賤皆鴈者鴈不亂羣不再偶也

主人筵于戶西西上右几

主人女父無父則尊而主昏者也昏禮於廟以重其事戶西客位筵爲神布神於客位如臨之也西上右几異於生人之位

使者立端至，擯者出請事入告。

使者，夫家之使立端朝服士以下通得服之。擯者，主人之擯而賓之有介可知矣。出請事，謙恐失禮而請問所當有事，乃入告於主人。

主人如賓服，迎于門外，再拜。賓不答拜，揖入。

賈氏公彥曰：大夫士惟有寢門大門而已。廟在寢門外之東，下有至於廟門，則此是大門。主人再拜，拜使者之主命也。使者不敢以主人自居，故不答拜。

至於廟門，揖入，三揖至于階，三讓。

揖入，三揖讓俱見士。冠禮故茲不重出。

主人以賓升西面，賓升西階，當阿東面，致命。主人阼階上北面再拜。

以賓升，主人先升而賓從之也。阿，室戶棟間。鄭康成曰：入堂深，示親親也。

授于楹間南面賓降出主人降授老鴈

李氏如圭曰楹柱也楹間堂東西之中也授授鴈南面謂主人也授者北面受者南面出出廟門老室者賈氏公彥曰授鴈訖賓降自西階出門主人降自阼階授老鴈於階立待後事以上納采

擯者出請賓執鴈請問名主人許賓入授如初禮

出請請所有事問名問女之名也賓執鴈請問名主人許之賓乃入授鴈如上納采之禮鄭康成曰問名者將歸卜其吉凶

擯者出請賓告事畢入告出請醴賓賓禮辭許

敖氏繼公曰醴與醴子之醴同事畢而醴使者致殷勤也賓禮讓而辭擯致主意賓許之待於次

主人徹几改筵東上側尊餽醴于房中

無亡甫反

鄭康成曰徹几改筵者鄉爲神今爲人側尊亦言無立酒側尊于房中亦有醴有邊豆如冠禮之設

主人迎賓于廟門外揖讓如初升主人北面再拜賓西階上北

面答拜主人拂几授校拜送賓以几辟北面設于坐左之西階

上答拜

校胡孝反辟音避校下乃切音釐

賈氏公彥曰如初升者如納采時三揖三讓也主人再拜者拜賓至此堂也鄭康成曰拂拭也拭几者尊賓新之也校几足辟遠通主人執几足授賓謙遜而以几設於坐左之若爲主人設者然於西階上答拜主人之敬蓋此几主人尊賓故設之使賓可隱而賓實未嘗隱几則几特備而不用故授几者主敬賓左之者賓敬主也

贊者酌醴加角柶面葉出于房

柶音四古文葉作搗

鄭康成曰贊者亦洗酌加角柶覆之如冠禮出房南面待主人迎受柶六寸七也以角爲之所以扱醴

主人受醴面枋筵前西北面賓拜受醴復位主人阼階上拜送

枋彼命反柶同

面枋便賓之酌也賈氏繼公曰西北面以賓在西階上不可背之賓拜於西階上復位俟既薦乃升席於賓之拜也主人少退主人拜送賓亦如之

贊者薦脯醢賓卽筵坐左執觶祭脯醢以相祭醴三西階上北面坐啐醴建相興坐奠觶遂拜主人答拜

鄭康成曰卽就也左執觶則祭以右手也凡祭於脯醢之豆間啐嘗也嘗之者成主人意建猶扱也興起也奠停也

賓卽筵奠于薦左降筵北面坐取脯主人辭

薦左邊豆之東降下也自取脯者尊主人之賜將歸執以反命辭者辭其親徹御案薦脯五挺橫祭於其上云取者取其邊內之一而已此非所祭者若特牲少牢俱云賓取祭以降則所祭者也

賓降投人脯出主人送于門外再拜

人謂從者門大門也以上同名醴賓卽問名之禮

納吉用鴈如納采禮

鄭康成曰歸卜於廟得吉兆復使使者往告昏姻之事於是定敖氏繼公曰如納采禮兼醴賓而言下禮放此愚按自納采以下所謂賓者不止主人之使蓋媒妁也男女無媒不相見而此篇無一言及媒如先儒因之殆非也此節言納吉

納徵立纁束帛儷皮如納吉禮

纁許云反儷音力移反今文纁作熏

程子曰徵證也成也用皮帛以證成男女之禮用玄纁者象陰陽備玄纁各五端爲束帛每端二丈儷兩也皮鹿皮古者昏以儷皮爲禮無玄纁用皮存古意也周官曰凡嫁子娶妻入幣純帛無過五兩備禮不尙財也王氏通曰昏娶而論財君子不入其鄉古者男女之族各擇德焉不以財爲禮此言納徵

請期用鴈主人辭賓許告期如納徵禮

男家卜得吉日使使往女家請期謙示不敢專也主人女家辭以吉期必由男家也賓許主人之辭乃告期其禮如納徵凡揖讓升降及禮賓送迎之事皆如之此言請期

期初昏陳三鼎于寢門外東方北面北上其實特豚合升去臠

舉肺脊二祭肺二魚十有四腊一臠髀不升皆飪設局臠去起呂反

臠音純髀筆倚反局居營反臠迷異反古文純爲鈞髀爲脾今文局作鉉臠皆作密

期娶妻之日初昏日方入時先陳壻與婦合巹之鼎鄭康成曰三鼎升豚魚腊寢壻之室也北面壻內也特一也合升合

左右胖升於鼎去蹠蹠甲不用也舉肺脊者食時所先舉也肺者氣之主周人尚焉脊者體之正未食先祭肺食時則祭脊舉肺與脊貴之故先飯則舉之每飯則嚼之祭肺別切肺以爲祭凡食而有牲俎者皆有祭肺此之肺脊皆二夫婦各一也魚十有四亦各七腊兔腊也肫作純全也凡膳用全體不升以其近竅賤之飪熟也肫所以扛鼎簠覆之

設洗于阼階東南

鄭康成曰洗所以承盥洗之器棄水者

饌于房中醯醬二豆菹醢四豆兼巾之黍稷四敦皆蓋饌助碗反醢呼

西反敦音對下並同

醯醬以醢和醬菹醢醢菹加醢敦黍稷類二者夫婦各一四者夫婦各二也巾以禦塵兼巾六豆而共一巾蓋之使其溫也

大羹滂在爨

大音泰滂音泣今文滂皆作汁

滂煮肉汁也不加五味爲大羹在爨取其熱也

尊于室中北墉下有禁立酒在西給冪加勺皆南枋冪迷釋反今文枋作

柄

鄭康成曰墉牆也禁所以廢無者立酒不忘古也綌粗葛冪覆也御案此尊爲夫婦之酌而設所謂內尊也禁以承尊有足者也士用之大夫用之則無足天子諸侯則廢禁亦無足南枋者取其便於酌

尊于房戶之東無立酒筐在南實四爵合盥

卷音謹

御案盥爵與外尊並列者爲贊位在外將酌以醕壻婦故設之於外爲便也盥破匏而爲飲器合之而實于筐及醕壻婦則各一既飲又可以合象夫婦也鄭康成曰四爵兩盥凡六爲夫婦各三醕以上陳器饌

主人爵弁纁裳緇褙從者畢立端乘墨車從車二乘執燭前馬

施逸戲反又音移從才用反下同二乘繩證反

主人壻也敖氏繼公曰此禮據壻家而言故以壻爲主人爵弁者以親迎常用上服也褙緣也纁裳則必緇衣而不言者舉施以見與衣帶同色也衣緇裳纁各爲其色而以緇緣褙象男下於女故故以衣帶上體同色之物下緣於裳也畢皆也從者乘二車皆立端墨車漆車也本大夫所乘今士乘之隆其禮也執燭前馬居馬前照道也

婦車亦如之有祧

祧昌占反同瞻

賈氏公彥曰亦如之亦乘墨車從車二乘執燭前馬也祧以蔽車以布爲之在上曰祧在下曰帷裳愚按此第言士之禮大夫以上其禮以漸而盛可知矣

至于門外主人筵于戶西西上右几

鄭康成曰門外婦家大門之外主人女父也賈氏公彥曰以先祖之遺體許人故女父先於廟設神席乃迎壻也御案白虎通云遣女於廟廟重先祖之遺體不敢自專故告廟也但設坐依神而臨其禮卽是告非別有奠酒瘞幣之儀也壻家來迎並無筵於廟之文蓋納吉請期兩番命卜於廟門則齋戒以告鬼神之義已備故親迎不必更行告廟之儀也

女次純衣纁紵立于房中南面

紵如占反

鄭康成曰次首飾也愚按周官追師掌爲副編次此第言次則以次該首飾之全也純衣絲衣玄色紵亦緣也婦人之徒貴純一衣不殊裳此時惟以纁緣其衣盛其禮且象陰氣上交於陽也

姆纁笄宵衣在其右

姆莫候反音茂又音母纁所綺反又山買反

婦如今乳母蓋貧寡而有德行者，在女之右，詔以婦禮也。纁，緇髮笄。若今時簪也。宵，綃同。玄，綃衣也。

女從者畢，袵立，纁笄被纁黼，在其後。黼音甫。反。

女從者，婦服之流，畢皆也。袵，單也。皆著單。玄衣，纁讀如裝，禪也。白與黑謂之黼，以黼為禪衣，而被於玄衣之上，尚飾也。

主人立端，迎于門外，西面再拜。賓東面答拜。

敖氏羅公曰：亦擯者出請入告，乃出迎之。此時賓爵弁服而主人立端，不嫌於服異者，主人不正與賓為禮，特拜而迎之，入廟耳。拜之者，迎賓之禮，賓壻也。

主人揖入，賓執鴈從。至于廟門，揖入，三揖。至于階，三讓。主人升西面，賓升北面，奠鴈，再拜稽首。降出，婦從降，自西階。主人不降送。

敖氏繼公曰：賓於外，門外即執鴈別於幣也。凡幣為禮者，至廟門乃執之。北面奠鴈，以女在房也。再拜稽首，禮之重者。至昏禮之始也。降出，謂出外門。俟婦車亦在大門外，主不降送，以壻與女相為禮也。

婿御婦車授綏婦辭不受

婿息詰反

鄭康成曰婿御者親而下之綏所以引升車者曲禮曰僕人之禮必授人綏故氏繼公曰曲禮云若僕者降等則受不然則否婿非降等也故婦辭不受於婿之辭婿乃舍綏既則女自取之以升御案前稱女今稱婦此時女已從男則成爲婦故遂以婦稱之

婦乘以几姆加景乃驅御者代

今文景作憬

婦人不立乘此更安之以几重初昏也景衣名鄭氏曰制如明衣加之以爲行道禦塵令衣鮮明也景亦明也驅行也行車輪三周而後御者乃代婿

婿乘其車先俟于門外

鄭康成曰婿乘之先者尊之也男率女女從男夫婦之義自此始門外婿家大門外以上親迎

婦至主人揖婦以入及寢門揖入升自西階媵布席于輿夫入于室卽席婦尊西南面媵御沃盥交

媵異證反與烏詰反御如字

御案家者婿之家故至門而婿稱主人入室則夫婦共之故入室而主人稱夫媵女之從者御婿家女侍也升自西階不敢當阼階意敖氏繼公曰與室中西墻下少南也夫婦既升而並俟於堂媵既布席乃入也卽席立于席上婦立于尊西則尊亦當戶明矣交者御沃媵盥媵沃御盥也居室之始卽行此禮相親相下之義鄭康成曰夫婦始接情有廉恥媵御交道其志此記夫婦入室

贊者徹尊罍舉者盥出除鼎舉鼎入陳于阼階南西面北上七俎從設北面載執而俟

贊者與舉者一人徹尊之罍將食也盥致潔也出出寢門入入寢門也載以俎承之也執執鼎俎以俟時而升蓋贊者也

七者逆退復位于門東北面西上

七者以七出鼎實者也以七出物而謂之七亦因其所用稱之七者事畢逆退其位

贊者設醬于席前菹醢在其北俎入設于豆東魚次腊特于俎北

李氏如圭曰醬爲饌本故先設之俎豚俎也醬與菹俱在
豆北豆東在菹醢之東其醬則下文黍在醬也敖氏經公曰
腊當豚俎北端而云特者明
不與豚俎爲列亦橫設之

贊設黍于醬東稷在其東設清于醬南

敖氏繼公曰黍在豚南稷在魚南清不言其器在豆可知
御案自贊者設醬至此乃夫席也其位在西而東面夫席先
設者男帥女
女從男也

設對醬于東菹醢在其南北上設黍于腊北其西稷設清于醬
北

此下設婦食之禮對醬者對夫席而設醬也賈氏公彥曰菹
在醬南其南有醢從北向南陳爲北上也若婿醢在菹北從
南向北陳爲南上清卽上文大羹
清在羹者羹宜熱臨食乃將入

御布對席贊啓會卻于敦南對敦于北會如字卻音約古
文啓爲開卻爲給

女御布婦席敖氏繼公曰未設而布婿席已設乃布婦席示
尊卑之義也鄭康成曰啓發也會合也謂敦蓋也御抑也量

合於地而抑之也凡云對者皆謂對夫席敖氏以爲不正相對非也婦雖後夫而實敵體記曰共牢而食同尊卑也婦始至以禮禮之不應以斜對爲對

贊告具揖婦卽對筵皆坐皆祭祭薦黍稷肺

贊者告饌具婿揖婦使卽席揖之而坐與祭同可知同尊卑之義也

贊爾黍授肺脊皆食以涪醬皆祭舉食舉也古文黍作稷

爾與邇通近也移之使近便其食也皆食明非虛設也以用也用涪醬和其食也皆祭未食先祭舉將祭將食必先舉之以示敬祭舉而食亦舉也

三飯卒食飯父返反

飯食之也一口爲一飯卒已也以上夫婦同食之禮

贊洗爵酌醕主人主人拜受贊戶內北面答拜醕婦亦如之皆祭

敖氏繼公曰洗爵洗於庭也醕之言繼也其字從酉既食之而復繼之以酒因以爲名取酒食相繼之義所以見殷勤也此拜受者皆在席戶內戶內之西也祭酒凡醕皆坐受爵

贊以肝從皆振祭嗜肝皆實于菹豆

計反

鄭康成曰肝炙肝也飲酒宜有肴以安之以肝從隨酒而進也振祭振動之以爲祭嗜嘗也嘗之而卽實于菹豆不以食爲禮也皆謂夫婦同然也

卒爵皆拜贊答拜受爵

皆拜拜其飲已也夫婦皆拜贊之勤贊答拜受爵出奠于篚更洗他爵以升

再醕如初無從

如初如初醕禮無從不復從以肝以前已進肝矣

三醕用盞亦如之

三醕用盞明三醕皆用盞也亦如之贊洗爵酌醕授夫婦拜答拜等禮皆同也敖氏謂三醕後乃用盞則經文當直云用

盥而不必
云三醕矣

贊洗爵酌于戶外尊入戶西北面奠爵拜皆答拜坐祭卒爵拜皆答拜興

贊既酌壻與婦則壻與婦當酌贊者而贊者賤且此禮主於夫婦合盥故不酌贊者而贊者自洗爵酌于戶外之尊既自酌乃入於戶西北面奠爵而拜主人若主人親酌之也夫婦皆答拜贊者拜畢乃坐舉爵而飲卒爵復拜夫婦皆答拜三人皆興於是醕婦之禮畢

主人出婦復位

敖氏繼公曰主人出爲將說服於房也婦當說服於室故不出惟變位而已

乃徹于房中如設于室尊否

鄭康成曰徹室中之饌設於房中爲饔餼餼之尊徹而不設於房以有外尊在房也

主人說服于房媵受婦說服于室御受姆授巾

說吐活反後同今文說作祝

說服皆謂去禮服也于房于室膜受御受不同以重別巾所以自潔

御衽于輿勝衽良席在東皆有枕北上

凡室西北隅爲輿非祭五祀之輿衽臥席也良良人謂夫也鄒市婦席慶布夫席示交接有漸之義

主人入親說婦之纓

鄭康成曰入者從房還入室婦人十五許嫁笄而禮之因著纓明有繫也蓋以五采爲之賈氏公彥曰纓有二男女未冠笄者總角紵纓皆佩客臭以纓佩香物爲尊者給小使此幼時纓也婦事舅姑如事父母紵纓某履紵纓結也婦人有纓示繫屬也此纓者是敖氏繼公曰主人親說之者明此纓爲己而繫也亦示親之

燭出

鄭康成曰昏禮畢將臥息賈氏曰出出於室

媵餼主人之餘御餼婦餘贊酌外尊酌之餼音

食餘曰餼酌外尊以酌媵御不敢酌主人之內尊也

媵侍于戶外呼則聞

今文侍作侍

侍當作侍惟媵侍于戶外者婦新來也無有所徵求便也此當是夫婦未寢之時故媵待於戶外若已寢則亦無所徵求且無終宵待于外之禮也呼則聞釋所以待之意外以上昏禮成

夙興婦沐浴纓笄宵衣以俟見

見賢遍反下同

夙早也昏之明日夫婦皆早起婦沐浴以致敬纓笄宵衣事舅姑之常服不盛飾也俟於己寢門外以俟饋者引見於舅姑

質明贊見婦于舅姑席于阼舅即席席于房外南面姑即席

古文

舅皆作咎

質平也舅席在阼階西面姑席在東房戶外南面

婦執筭棗栗自門入升自西階進拜奠于席

筭音煩

筭竹器其形如筓衣之以青繒以筭盛棗栗由舅姑寢門而入升自西階進近於席始拜奠棗栗于席

舅坐撫之興答拜婦還又拜

撫棗栗以示受也興而答拜敬也婦還至前拜處又拜不敢當舅之答拜也

降階受笄殿脩升進北面拜奠于席姑坐舉以興拜授人殿丁玩反

石經作段同

賈氏公彥曰加薑桂殿治者謂之脩不加薑桂以鹽乾之者曰脯散文則脩脯通此殿脩婦入門時不執之者蓋別有執之者畧遜於舅也姑舉之以興則不但撫之而已拜姑答拜授人姑授侍御者不言婦還拜省文也以上婦見舅姑

贊醴婦

贊爲舅姑醴婦以示親厚之意且婦必見醴乃成爲婦也敖氏繼公曰是時舅姑皆立於席

席于戶牖間

鄭康成曰室戶西隅東南面位

側尊無醴于房中婦疑立于席西疑魚乙反

鄭康成曰疑正立自定之貌賈氏公彥曰以其禮未至故疑然自定而立以待事敖氏繼公曰亦有籩邊豆在其北惟云

側尊
省文

贊者酌醴加枳面枋出房席前北面婦東面拜受贊西階上北面拜送婦又拜薦脯醢

面枋以便其受婦東面拜者舅姑在東面之拜也婦又拜者拜贊者之醴已也薦脯醢亦贊者薦之

婦升席左執觶右祭脯醢以枳祭醴三降席東面坐啐醴建枳興拜贊答拜婦又拜奠于薦東北面坐取脯降出授人于門外

解支義反
啐指壽反

鄭康成曰奠於薦東升席奠之人婦氏之人也以上醴婦

舅姑入于室婦盥饋饋其

位反

婦出授人脯反而行饋禮以明
孝養之義以食食人謂之饋

特豚合升側載無魚腊無稷並南上其他如取女禮

取七
位反

特厥合升而載之二俎一載之舅一載之姑也並南上舅姑之席皆在奧故各以南爲上也其他謂醬滹菹醢取禮取婦時之禮

婦贊成祭卒食一醕無從醕羊進反今文無成字

贊成者婦侍而贊之以成其祭

席于北墉下

鄭康成曰室中北墉下賈氏公彦曰此席將爲婦餞之位處

婦徹設席前如初西上婦餞舅辭易膳

婦徹舅席設席前設饌而前就北墉之席也如初如前舅席設魚膳等也婦自設席設饌而餞舅之餘舅辭讓若以爲褻者則易其所設之簪以示更新之意

婦餞姑之饌御贊祭豆黍肺舉肺脊乃食卒姑醕之婦拜受姑拜送坐祭卒餞姑受奠之

餼舅之餘不贊祭而餼餼姑之餘用贊者婦於舅分疎而於姑較親故獨重其禮也姑醕之者亦加厚之意拜受拜送受其皆以婦與姑朝夕相親隆其禮以勸也

婦徹于房中媵御餼姑醕之雖無媵媵先於是與始飯之錯

各反放音措古文始爲姑

古人嫁女以姪娣從蓋用同姓之女天子諸侯則然大夫以下或不盡然其從也必無終身爲之服役之禮此事孔孟不言左傳及此書有之且隨文詰之婦徹其餘入房媵御餼之而姑醕之蓋客之也或無娣亦必媵先者媵爲女家之使必客之也與始飯之錯者御案明媵御餼者止飯黍而無食舉也蓋舅姑之俎皆賄奔各一姑所舉者婦餘之矣舅所舉者媵亦不敢褻焉於是媵御止與始飯教黍而交錯餼之以四簋黍則餼以黍爲主可知或曰古文作姑姑飯者媵御共餼姑之飯黍而不餼舅飯亦不敢褻之意云錯者謂取姑教黍分設之以上媵嚴舅姑

舅姑其饗婦以一獻之禮舅洗于南洗姑洗于北洗奠醢

飲而用牲醴曰饗饗婦答婦之饋也舅洗爵以獻姑洗解以酬皆拜婦皆答拜奠酬者婦取姑之酬酒而奠之於薦東也不燕者尊卑之分嚴也此禮行於厥明

舅姑先降自西階婦降自阼階

喪禮行於戶屬間故降階舅姑先降自西階然後婦降自阼階使婦爲主明代己之義

歸婦俎于婦氏人

舅姑饗婦有俎牲婦不食以之歸於婦家明其女見禮於舅姑也以上饗婦

舅饗送者以一獻之禮酬以束錦姑饗婦人送者酬以束錦若

異邦則贈丈夫送者以束錦錦古文皆作帛

送者有司及其隸子弟之妻妾異邦則不特酬以錦而又贈以錦重其遠也以上禮送者愚按細味此文則古所稱以姪娣從蓋卽送者之屬而丈夫亦送焉至婦成禮之後丈夫送者歸而姪娣亦歸其有留者不過所廢之婢僕不然以姪娣從而終身服役遂成怨曠先王制禮不若此之不近人情也

若舅姑既沒則婦入三月乃奠菜席于廟奧東面右几席于北方南面

舅沒姑存則當時見姑三月廟見舅若舅姑俱沒則婦入三月乃奠菜於舅姑之廟奠菜以篚祭菜也猶舅姑存時饋於室也生時見舅姑舅姑別席異面今亦別席異面象生時不與常祭同也凡祭不別席以有尸也此不立尸無別席生時婦饋舅姑皆東面此則姑席南面者配位也生時見舅姑不用几此有几者神之也姑席無几几主於尊者故惟東面舅位有几也

祝盥婦盥于門外婦執筭菜祝帥婦以入祝告稱婦之姓曰某氏來婦敢奠嘉菜于皇舅某子婦拜扱地坐奠菜于几東席上還又拜如初扱初治反

洗在門外故祝與婦盥而後入執筭菜者在門外授婦異於生時之贊見祝者帥當以婦人爲之皇大也子男子之美稱婦初來見舅姑故不嫌稱舅之姓也扱地手至地也敖氏繼公曰奠菜於几東席上則是几前猶有餘席還又拜拜反於

初拜時之位復拜也此廟見舅

婦降堂取筭菜入祝曰某氏來婦敢告于皇姑某氏奠菜于席如初禮

降堂取筭菜以入而祝帥以告於姑其奠拜之禮悉如初也

婦出祝闔牖戶老醴婦于房中南面如舅姑醴婦之禮

婦出廟堂祝先闔牖而後闔戶老家長蓋舅姑生時所任用者故因使醴婦於廟之房中象舅姑生時使贊醴婦於寢之戶牖間也

以上奠菜

壻饗婦送者丈夫婦人如舅姑饗禮

舅姑存自饗送者今已沒故壻兼饗丈夫婦人如舅姑饗禮亦有酬錦之等也敖氏繼公曰此禮當在始嫁之時因言廟見而及之故其文在此

以上舅姑沒饗送者

記

此下雜記昏禮諸事經所不備者蓋漢儒以所聞實之

士昏禮凡行事必用昏昕受諸禰廟辭無不腆無辱昕音欣禰乃禮反腆

他典反

昕黎明也納采問名納吉納徵請期皆用昕親迎用昏禰廟父廟也古時非宗子之家不別立祖廟餘但有禰廟祖尊而禰親受昏禮宜於親者故受諸禰廟尋常饋問則謙言物之不厚賓之辱臨昏禮好合故賓不言幣之厚主人不謝來辱從其質也

贊不用死皮帛必可制腊必用鮮魚用鮓必殺全鮓音附

贊惟用鴈儼皮必可制爲衣物教婦以誠信之義用鮮貴新也鮓鮓也此魚多旅行取夫婦相附之義殺全鄭康成曰不餒敗不剝傷取夫婦全節無虧之義以上記行事之時及所用之物

女子許嫁笄而醴之稱字祖廟未毀教于公宮三月若祖廟已毀則教于宗室

女子十五而許嫁已受納徵禮卽笄而醴之如男子冠其禮主婦女賓行之教教以婦德婦言婦容婦功也公宮宗室卽士族之貴者言以該其他祖女所自出之先君由公族而分支者其先世祖廟未毀則服屬於君爲近則教于公宮引而親之如家人然祖廟旣毀則教于大宗之家此記笄女及教于

問名主人受鴈還西面對賓受命乃降

鄭康成曰受鴈於樞間南面還於阼階上對賓以女名賈氏公彥曰經直云問名如納采之禮納采禮中無主人西面對事故記之此記問名之儀

祭醴始扱一祭又扱再祭賓右取脯左奉之乃歸執以反命奉

反勇

賈氏公彥曰祭醴謂贊醴賓之時禮成於三始祭醴之初扱一祭及又扱則分爲兩祭是爲三也經直云降筵北面坐取脯不言左右手故記之先用右手取得脯乃用左手兼奉之以降授從者于西階下乃歸執以反命此記祭醴取脯之儀納徵執皮攝之內文兼執足左首隨入西上參分庭一在南之

涉反
下同

敖氏繼公曰攝讀爲摺疊也今人屈物而疊之謂之摺執皮攝之者中屈其皮疊而執之內文兼執足攝之之法也文獸毛之文內文者事未至也左首爲西上也云隨入者以其並設嫌亦並行也西上統於賓也參分庭一在南者參分庭深而所立之處當其三分之一故二分在北一分在南也此設之位亦當在西方

賓致命釋外足見文主人受幣士受皮者自東出于後自左受遂坐攝皮逆退適東壁見賢遍反

賓既致命納幣者則張皮使文采外見主人受幣其主人執役之士則自門東而來出于執皮者之後自其左而受之遂坐仍攝皮卻退適於東壁不當賓主之前也此記執皮

父醴女而俟迎者母南面于房外女出于母左父西面戒之必有正焉若衣若笄母戒諸西階上不降迎魚敬反下同

御案女將嫁而父醴之猶子將親迎而父醴之也昏姻者人道之始且將發戒命故先加禮敬焉父醴女於房中南面

母薦之醴畢母出房戶之西南面父出而立於阼階上女出於母左而就之東面受戒父乃戒訓之雖女衣笄本正父必復正之以爲識母戒諸西階上戒詞見後不降不降送也女去而不辭有歸寧之日示不忍去意父母戒而女不諾者重恥也

婦乘以几從者二人坐持几相對

婦乘以几上車二人坐而相對持几重慎之以上記醴女及女升車

婦入寢門贊者徹尊罍酌玄酒三屬于尊棄餘水于堂下階閒

加勺

屬音注又音燭

御案酒則先實于尊而置之惟玄酒臨時方酌故記明之玄酒明水浼水皆水也古無酒惟用明水後人用酒猶設明水以示不忘古之意寢門先設二酒尊而罍之迨婦入則徹其罍別酌玄酒凡三注於尊中注畢其餘水棄于堂下玄酒之尊加勺於上亦當飲之明非虛設也此記玄酒

笄緇被纁裏加于橋舅答拜宰徹笄今文橋爲鎬

筭以竹爲之用繼爲表繼爲裏加于橋櫓之制未聞蓋以竹木之屬爲之所以廢筭婦見舅姑必筭加飾焉以致其敬故舅答拜也拜後徹筭賈氏公彥曰經惟云筭不言表裏加飾之事故記之此記筭

婦席薦饌于房饗婦姑薦焉

醴婦則席薦饌皆于房無俎饗婦舅獻爵姑薦脯醢

婦洗在北堂直室東隅篚在東北面盥

設洗以爲婦盥在北堂當室東隅賈氏公彥曰房與室相連爲之房無北壁故得北堂之名篚以盛爵饗爲婦酢姑酬之用婦北面而盥將洗以酢舅也

婦酢舅更爵自薦

賈氏公彥曰饗婦舅獻姑薦今婦酢舅婦自薦之變別人薦故記之敖氏繼公曰凡卑者受尊者獻則不敢酢婦乃酢舅者饗婦則婦如賓也愚按更爵不卽以舅獻己之爵還酢舅示別也自薦者以子道行之不敢當賓也

不敢辭洗舅降則辟于房不敢拜洗

避音

舅將獻婦之時設洗以致敬婦不敢辭舅降洗婦既不從降
又不敢安於堂上故辟於房亦不拜洗不辭不拜者不敢用
賓主敵體之禮也

凡婦人相饗無降

賈氏公彥曰婦人有所事不下堂言凡者見舅姑共一室婦
及姑饗婦人送者皆然以上記饗婦及婦人相饗之事

婦入三月然後祭行

古人井在於行祭行即祭井也婦入三月則成婦矣故始祭
井以示主中饋之意若以爲助祭則當云與祭不言祭行此
記祭行

庶婦則使人醑之婦不饋

醑子召反

庶婦庶子之婦也使人醑之不饗舅姑亦不親也庶婦見
舅姑其禮皆與適同惟舅姑不饋爲異此記庶婦不饋

昏辭曰吾子有惠貺室某也某有先人之禮使某也請納采

音貺

此男家使請納采之詞吾子謂女父某婿名某有婿父名某也使者名言吾子已惠賜某之室也今某使某請納采

對曰某之子蠢愚又弗能教吾子命之某不敢辭客反

女家使摺者對辭言女性不敏己又弗能教也然吾子既命之亦不敢辭

致命曰敢納采

使者升堂致命於主人云然

問名曰某既受命將加諸卜敢請女爲誰氏對曰吾子有命且以備數而擇之某不敢辭

上某使者名下某女父也受命受其納采之禮加諸卜將以女名問卜誰氏謂伯仲之間謙不敢直指之也有命謂問女名也備數謙辭

醴曰子爲事故至於某之室某有先人之禮請醴從者對曰某既得將事矣敢辭先人之禮敢固以請某辭不得命敢不從也

醴醴賓也言從者謙不敢斥之賓言己既行事矣不敢復
渙主人主人又固請賓乃諾之不得命主人不許其辭也

納吉曰吾子有貺命某加諸卜占曰吉使某也敢告對曰某之

子不教唯恐弗堪子有吉我與在某不敢辭與音預

有貺謂問名而許之與在言己亦幸
與其吉蓋合二姓之好吉凶共之也

納徵曰吾子有嘉命貺室某也某有先人之禮儷皮束帛使某
也請納徵致命曰某敢納徵對曰吾子順先典貺某重禮某不
敢辭敢不承命

使者致主人之意於擯者言吾子有嘉命既賜之室矣某有
先人之禮儷皮束帛使某請納徵於是擯者致使者之命曰
請納徵非使者即升堂致命也先典即先
人之禮昏禮納徵而後昏姻成故曰重禮

請期曰吾子有賜命某既申受命矣惟是三族之不虞使某也
請吉日對曰某既前受命矣唯命是聽曰某命某聽命于吾子

對曰某固惟命是聽曰某使某受命吾子不許某敢不告期曰
某日對曰某敢不敬須

賜命謂以女許申受命謂納采以後重受其命三族父族母
族妻族舊以爲父昆弟己昆弟子昆弟然屬一族之人而分
言之於義不安且此言三族不虞大概言或有喪亡不可行
婚禮耳對言唯命是聽謙不敢主期也使君再請然後告之
以期須待也

凡使者歸反命曰某既得將事某敢以禮告主人曰聞命矣

凡使者歸反命與主人告對
之詞皆然以上記五禮之辭

父燕子命之曰往迎爾相承我宗事助帥以敬先妣之廟若則

有常子曰諾唯恐弗堪不敢忘命相息亮反
助許玉反

子將親迎父燕之於寢蓋將娶婦以承宗廟故重而禮之相
助也婦助夫者也宗事宗廟之事助勉若女也先妣祖妣不
言姑者承上宗事言之夫爲妻妻綱故勉子以有常卽上文所
謂帥以敬親迎敬之也當終身於敬子諾而云恐不堪承父

之教然固不敢忘也因拜
受解此記父饗子之辭

賓至擯者請對曰吾子命某以茲初昏使某將請承命對曰某
固敬具以須

鄭康成曰賓婿也命某婿父名茲此
也將行也使某行昏禮來迎須待也

父送女命之曰戒之敬之夙夜毋違命毋施衿結帨曰勉之敬

之夙夜毋違宮事

古文毋爲無衿其
陰反帨舒僂反

父命敖氏繼公曰此鄭正衣若笄之語夙夜舉一日之始終
而言命謂舅姑與夫之命母命即戒諸西階上語施衿結帨
亦欲以此爲識耳宮猶家也凡宮中之事無違尊者之
命婦人無外事故惟以此戒之衿衣小帶帨佩巾也

庶母及門內施鞶申之以父母之命命之曰敬恭聽宗爾父母

之言夙夜無愆視諸衿鞶

鞶布
干反

庶母父之妾釁革鞶也內則女鞶絲所以盛帨巾之屬事舅
姑者申重也宗尊也庶母遜於父母故送及門內而施以鞶

不敢自專申之以父母之戒勉其早晚
無過凡有所爲常視衿帶如見父母也

壻授綏姆辭曰未教不足與爲禮也

壻親迎授綏姆代女辭謙言未受教
夫不必爲禮以上記親迎送女諸辭

宗子無父母命之親皆沒己躬命之支子則稱其宗弟稱其兄

此記父母沒昏禮命使者之禮宗子大宗適長子若父老而
傳則父命之父沒母存母命之若父母皆沒則己命之
案宗子不統於旁尊也支子庶子及諸子稱其宗
之尊者若伯叔父等無伯叔尊者則弟稱其兄

若不親迎則婦入三月然後壻見曰某以得爲外昏姻請覲

昏必親迎父母在則承父母以往父母沒則伯叔父及兄皆
可命之上文所記命使者之辭是也此不親迎必無父母又
無伯叔兄者前人以爲但無父者非也壻見見於婦之父母
必待三月者三月而後成婦亦如婦三月廟見也外昏姻謙
辭覲
見也

主人對曰某以得爲外昏姻之數某之子未得濯摝於祭祀是

以未敢見今吾子辱請吾子之就宮某將走見

濯文學反概古代反

主人女之父某之子謂其女言己女得與於祭己未敢見壻請壻歸家己當走而相見蓋謙辭之也濯洗櫛拭也祭祀必濯櫛祭器謙言女之婦職然也按此則不親迎者必壻見於女父母而後婦見於廟皆男先於女之義也

對曰某以非他故不足以辱命請終賜見對曰某以得爲婚姻之故不敢固辭敢不從

賓又致命言無他故敢煩走相見請終賜見而主乃許之敖氏謂此賓主之辭皆擯者傳之是也

主人出門左西面壻入門東面奠摯再拜出

鄭康成曰出門出內門入門入大門不出大門者異於賓客奠摯者壻有子道不敢受也壻於主人不敢敵禮故奠贊而

不受恐主人先拜故奠贊卽出

擯者以贊出請受壻禮辭許受贊入主人再拜受壻再拜送出

主人不敢當壻敬己之意使擯者以贊出請壻以賓客禮見己當親受其贊壻又以禮辭讓主人復請乃許之受擯者所

執之贊入門親授主人
拜受婿拜送而後出

見主婦主婦闔扉立于其內婿立于門外東面主婦一拜婿答
拜主婦又拜婿出

主婦妻之母主人之妻故稱主婦爾雅母與妻之黨爲兄弟
故當見之婦人禮不踰域闔左扉立于門內示外內之限也
鄭康成曰主婦先一拜
者婦人於丈夫必佚拜

主人請醴及揖讓入醴以一獻之禮主婦薦奠酬無幣婿出主
人送再拜

婿出主人送於門外因請醴之及與也婿亦禮辭主人固請
乃與之揖讓而入主婦薦示夫婦共此禮也無幣異於賓客
婿奠酬卽出主人送于外門外御案主人拜婿不答
拜凡送賓之禮皆然也以上記不親迎婿見妻父母儀

附解昏姻之道人倫之始自古迄今未有夫婦之道不正而能
齊家者也男正位乎外女正位乎內夫夫婦婦而家道正正

家而天下定矣關雎之詩言淑女宜配君子蓋有是夫然後有是妻而有是妻尤必得其夫古人養教之法詳無論男女自在童蒙皆教之以禮樂敬慎之道而爲之父母者又必實有正心齊家之道然後可以教子女而成人自禮樂不興教化不明則父母不能倡教于前男女不能率教於後於是婚姻之事以爲苟相悅情相昵而已卽如此書之儀六禮備文貌治亦未必其有賢婦尤未必其能正內正外而修人紀也况後世比閭族黨之法不修親迎之禮難以概行則此書所言幾同畫餅若必求淑女而配君子安能限於一鄉一井之間以爲婚媾哉故此篇所記昏禮讀者當卽是以求其風俗之淳禮制之原知誠正修齊有必盡之功然後能如此若斤

斤講求古法而不達於時勢之殊與夫人倫之本必拘而不可通滯而不可行矣